

Gabinete Mike Eman ta restaura edificio decai di Belastingkantoor y pone bek na servicio di pueblo

E edificio bieu di Belasting ta un inversion grandi cu pais Aruba ta haciendo riba termino largo. E ta ubica riba un tereno importante den centro di ciudad loke ta haci un propiedad masha valioso. E edificio aki durante añanan di gobernacion anterior a wordo laga pa su cuenta, a decai y adictonan a haci'e nan cas. Un situacion penoso cu no por a sigui. Gabinete Mike Eman a pone restauracion di e edificio aki den su programa BoAruba y dentro di poco e trabounan ta cuminsa.

Anti socialnan y adictonan am-

bulante a haci di e edificio nan cas a cana kibra eyden, tambe a laga airco cendi y te hasta telefon a wordo uza manera cu nan a haya ta bon. Te hasta tabata haci negoshi riba custia di pueblo, cobrando hende pa haci yamada pa exterior. No a duna ningun balor na loke ta di e ciudadanonan di Aruba. Tabata hopi lamentabel loke tabata sosode den un edificio cu ta propiedad di pueblo.

Tin indicacion cu e motibo cu a muda e departamento di e edificio dor di e gobierno anterior tabata e holo malo cu tabata presenta regularmente y cu

tabata mara na un situacion di e tereno. Esaki ta algo cu segun conocedonan di e caso, departamento di obranan publico lo por a soluciona facilmente y sin mucho gasto. E opcion scogi e tempo ey pa construi un edificio nobo y laga e otro bay perdi, sin duda no tabata e miho.

Tur esaki ta forma parti di un maneho negligente e irresponsabel; un falta di vision y boluntad caminda cu ni sikiera por a desocupa un edificio na un manera corecto. A bay lagando conexion di corriente, di telefon habri y awa tabata core por nada. Atras, a laga tambe



mashinnan y mueblenan y te hasta por a mira documentonan personal di hopi pagado di belasting tira riba vloer y tambe den cahanan. Pero no solamente adictonan ambulante tabata biba y haci negoshi den e propiedad di pueblo, tambe nan tabata reuni, consumi droga y te hasta haci nan necesidadnan unda cu ta. Mescos cu den otro casonan, di edificionan bandona, sea publico of priva, no ta pasa hopi tempo prome cu ta presenta un candela. Si no a haci nada, pronto e edificio lo a wordo destrui, of pio ainda, su deteriora lo por a ocasiona un desgracia.

Ora cu Gabinete Eman a tuma rienda di pais Aruba, un di e prome obranan di Minister di Infraestructura, Benny Sevinger, tabata pa DOW atende cu e edificio aki y cuminsa traha riba su restauracion. A busca un solucion pa e adictonan y a pone vigilancia mientras cu tabata traha riba e luga. Pareu cu a benta afo tur loke no tabatin balor mas y a warda loke ainda por a scapa; tambe a laga haci un evaluacion di henter e estructura pa mira den ki condicion e edificio tabata.

Un bes cu a determina kico por a scapa ainda, tabata un satisfaccion di sa cu no ta henter e propiedad a bay perdi y cu su skelet di hero ta den bon estado; loke a nifica cu a spaar hopi placa den e plannan pa su futuro. A bay over na kita henter e division paden cu ta e murayanan cu ta reparti e espacio den diferente oficina y sala. Tambe a kita e murayanan parti pafo cu ya tabata den mal estado y tabata representa un peliger pa tur peaton y auto den area,

ya cu na cualkier momento nan por a kita cay.

Minister di Infraestructura Sevinger mientrastanto ya a duna ordo pa aloca e fondonan y prepara e plannan pa duna e edificio un di dos bida y bolbe haci'e util na beneficio di pueblo. Arkitectonan di DOW a cuminsa traha riba e plannan y diseño enfoca riba miho uzo di espacio y tambe un operacion sostenibel. Mirando e espacio grandi di seis piso, a conclui cu sigur dos departamento lo por muda pa e localidad aki.

Asina a sugeri pa e departamentonan di Directie Arbeid y Departamento di Integracion y Maneho di Admision di Stranhero, miho conoci como DIMAS ta muda bay p'ey. Di e manera aki Gabinete Mike Eman ta ehecuta su vision di un miho maneho di recursonan publico dor di stop di paga huur na edificio priva. Mescos a haci cu e otro ruinan cu gobierno anterior a laga atras manera Watertoren Playa y San Nicolas, Edificio di Corte y te hasta Bestuurskantoor. Ainda e gobierno actual tin pa rescata John F. Kennedyschool, entre otro. Ya Gobierno hunto cu Hulanda a percura pa aloca pa medio di Fondo Desaroyo Aruba, e 10.9 milyon florin necesario pa reconstruccion di e edificio bieu di Belasting. E proceso pa bestek y destaho publico ta canando y pa comienso di 2013 e trabounan mes lo inicia. Asina den termino di maximo 16 luna, e edificio lo ta cla pa brinda servicio bek na comunidad. E desaroyo y su eventual resultado ta otro muestra di e vision social di progreso di Gabinete Mike Eman.